



Komisija za vanjsku trgovinu i carine
Povjerenstvo za vanjsku trgovinu i carine
Broj 01/3-50-1-3-27/09
Sarajevo, 19. januara 2009.godine

Комисија за спољну трговину и царине

Z A P I S N I K
27. sjednice Komisije za vanjsku trgovinu i carine
Predstavničkog doma Parlamentarne skupštine BiH,
održane 19. januara 2009.

Sjednica je počela u 13 sati.

Sjednicom je predsjedavao prvi zamjenik predsjedavajućeg Komisije Mehmed Suljkanović. Sjednici su prisustvovali članovi Komisije: Slavko Jovičić, Salko Sokolović, Hadži Jovan Mitrović, Šemsudin Mehmedović, Jozo Križanović i Jerko Ivanković Lijanović. Opravdano je odsustvovao Ekrem Ajanović.

Sjednici su prisustvovali: Hajrudin Podbičanin, pomoćnik ministra vanjske trgovine i ekonomskih odnosa BiH, Ranko Šakota, pomoćnik ministra finansija i trezora BiH, Nenad Pandurević, sekretar Komisije za vanjsku i trgovinsku politiku, carine, saobraćaj i komunikacije Doma naroda PSBiH, Zoran Brkić, viši stručni saradnik u PSBiH, Radomir Marjanović, stručni savjetnik, i Emira Češljarić, sekretar Komisije za vanjsku trgovinu i carine.

Prije usvajanja predloženog dnevnog reda, predsjedavajući Komisije upoznao je prisutne da je Kolegij Predstavničkog doma na 81. sjednici, održanoj 12. 1.2009., prihvatio inicijativu MVTEOBiH da se do februara 2009. godine na sjednici Komisije i Doma odgodi razmatranje **Izveštaja o realizaciji Akcionog plana za provođenje programa mjera u okviru CEFTA Sporazuma i Informacije o robnoj razmjeni BiH za prvih devet mjeseci 2008.godine.** Također, predloženo je da se tačka dnevnog reda Tekuća pitanja dopuni alinejom c) prigovor na ponovnu raspodjelu radnih prostorija Komisiji.

Na osnovu predloženog jednoglasno usvojen je sljedeći

D N E V N I R E D

1. Usvajanje Zapisnika 26. sjednice Komisije,
2. Popunjavanje upražnjenog mjesta predsjedavajućeg Komisije na osnovu člana 33.stav (2) Poslovnika Predstavničkog doma,
3. Razmatranje Prijedloga zakona o dopuni Zakona o carinskoj tarifi BiH, predlagač: Vijeće ministara BiH (na osnovu člana 126. Poslovnika Predstavničkog doma) radi dostavljanja mišljenja o principima predloženog zakona predsjedavajućem Doma,
4. Razmatranje Izveštaja o radu Komisije za 2008. (na osnovu člana 31. stav (2) Poslovnika, Komisija podnosi izvještaj Predstavničkom domu),
5. Razmatranje Orijentacionog radnog plana Komisije za 2009.godine,

6. Dostavljanje prijedloga i mišljenja Komisije za izradu Orijentacionog radnog plana Predstavničkog doma za 2009.godine na osnovu dopisa Proširenog kolegija Predstavničkog doma br.01-50-1-21-39/08, od 18.12.2009.,
7. Tekuća pitanja:
 - a) molba Sektora za međunarodne odnose i protokol za dostavljanje okvirnog pregleda međunarodnih aktivnosti Komisije u 2009. godini,
 - b) razmatranje i zauzimanje stava Komisije o predstavkama „Vegafruit“ d.o.o. za trgovinu, preradu voća i povrća Doboj Istok; Grupacije bezalkoholnih pića VTKBiH; i Udruženja proizvođača i prerađivača mesa u BiH,
 - c) Prigovor na ponovnu raspodjelu radnih prostorija Komisiji.

Ad. 1. Usvajanje Zapisnika 26. sjednice Komisije

Zapisnik 26.sjednice Komisije usvojen je jednoglasno, bez primjedbi.

Ad.2. Popunjavanje upražnjenog mjesta predsjedavajućeg Komisije na osnovu člana 33. stav (2) Poslovnika Predstavničkog doma

Na osnovu člana 33. stav (2) Poslovnika, Komisija je, s pet glasova „za“ , jednim „protiv“ i jednim „suzdržanim“ glasom, odlučila da upražnjeno mjesto predsjedavajućeg Komisije privremeno popunjava član Komisije **Slavko Jovičić**. O navedenom je potrebno obavijestiti Predstavnički dom.

Ad. 3.Razmatranje Prijedloga zakona o dopuni Zakona o carinskoj tarifi BiH, predlagač: Vijeće ministara BiH (na osnovu člana 126. Poslovnika Predstavničkog doma) radi dostavljanja mišljenja o principima predloženog zakona predsjedavajućem Doma

U uvodnim napomenama o Prijedlogu zakona predsjedavajući sjednicom Mehmed Suljkanović rekao je da je Vijeće ministara BiH uputilo, 25. decembra 2008., Prijedlog zakona o dopuni Zakona o carinskoj tarifi BiH Parlamentarnoj skupštini BiH, sa zahtjevom za razmatranje po hitnom postupku, u skladu s članom 127. Poslovnika Predstavničkog doma.

Predstavnički dom na 43. sjednici, održanoj 29.decembra 2008., nije prihvatio zahtjev za razmatranje Prijedloga zakona po hitnom postupku i odlučio da Zakon razmatra po skraćenom postupku, u skladu s članom 126. Poslovnika Predstavničkog doma.

Ustavnopravna komisija Predstavničkog doma razmatrala je Prijedlog zakona o dopuni Zakona o carinskoj tarifi BiH na 60. sjednici, održanoj 13. januara 2009., i jednoglasno utvrdila da postoji valjan ustavnopravni osnov za donošenje Zakona o dopuni Zakona o carinskoj tarifi BiH.

U raspravi su učestvovali: Šemsudin Mehmedović, Jozo Križanović, Hajrudin Podbičanin, Jerko Ivanković Lijanović, Hadži Jovan Mitrović i Salko Sokolović.

Šemsudin Mehmedović naglasio je da je od početka rada Komisija za vanjsku trgovinu i carine nastojala da olakša rad privrede predlažući izmjene i dopune određenih zakona koje nisu dobile odobrenje od UOUIOBiH, pa se ponekad ulazilo u politički sukob sa MVTEOBiH. Ako ocijenimo da ćemo olakšati posao privredi, spreman sam podržati Prijedlog zakona s tim da se u potpunosti eliminišu predložene kvote, a u protivnom smatram da se ostavlja mogućnost spekulacijama.

Jozo Križanović podržao je diskusiju Mehmedovića i postavio pitanje predlagaču - zašto se ovaj prijedlog odnosi samo na šećer, šta je s drugim artiklima gdje imamo prerađivačke kapacitete. Ne želim da ovaj proizvođač bude kolatelarna šteta pa predlažem da MVTEO ispita i uradi analizu ovakvih potreba svih prerađivača kako bi naš rad bio sveobuhvatan.

Mehmed Suljkanović podržao je diskusiju svojih kolega pogotovo zato što je traženo usvajanje po hitnom postupku.

Hajrudin Podbičanin je, u ime predlagača Zakona, istakao da je MVTEOBiH Prijedlog zakona uradio na osnovu zahtjeva firme „Bimal“ te da je UIOBiH dao odobrenje za dopunu Zakona, naglašavajući da je Zakon urađen tako da nema mjesta zloupotrebama.

Jerko Ivanković Lijanović također je podržao diskusiju Mehmedovića i Križanovića.

Hadži Jovan Mitrović izrazio je bojazan da bi navedene analize zakasnile i bile nepotrebne za prerađivača „Bimal“ jer zbog neiskorištenosti kapaciteta može doći do otpuštanja radnika.

Salko Sokolović rekao je kako smatra da je potrebno, s obzirom na to da je na Prijedlog zakona Upravni odbor UIOBiH dao saglasnost, utvrditi da li su privredni subjekti predložili još neke inicijative za dobivanje carinskih olakšica prilikom uvoza određenih sirovina za preradu.

Nakon rasprave, Komisija **je jednoglasno prihvatila principe Zakona**, te će, na osnovu člana 104. Poslovnika Predstavničkog doma, dostaviti mišljenje predsjedavajućem te jednoglasno usvojila sljedeći z a k l j u č a k :

a) zadužuje se MVTEOBiH da, u saradnji s Vanjskotrgovinskom komorom BiH, sačini listu proizvoda prema potrebama i drugih proizvođača i prerađivača iz oblasti poljoprivredne proizvodnje, metalne i tekstilne industrije i sl. koji imaju potrebu za dobivanjem olakšica, bez plaćanja carine za uvoz određenih kvota sirovine s ciljem podsticaja i konkurentnosti domaće proizvodnje. Navedenu listu dostaviti najkasnije do razmatranja Zakona u drugom čitanju;

b) zadužuje se MVTEOBiH da, u saradnji s Vanjskotrgovinskom komorom BiH, uradi listu proizvoda i analizu sličnih potreba poljoprivredne, metalne, tekstilne i drugih privrednih grana s ciljem stimuliranja proizvodnje kako bi se na isti način učinile konkurentnijim i aktivnijim.

c) zadužuje se MVTEOBiH da razmotri predstavku Udruženja proizvođača i prerađivača mesa u BiH, upućenu Komisiji 5. januara 2009., u okviru ostalih potreba drugih proizvođača i prerađivača određenih proizvoda.

Ad. 4. Razmatranje izvještaja o radu Komisije za 2008. godinu, (na osnovu člana 31. stav (2) Poslovnika, Komisija podnosi izvještaj Predstavničkom domu)

Komisija je jednoglasno usvojila Izvještaj o radu za 2008.godinu, uz prijedlog da sastavni dio Izvještaja bude pojedinačni pregled prisustva njenih članova sjednicama Komisije.

Ad. 5. Razmatranje Orijentacionog radnog plana Komisije za 2009.godinu

Orijentacioni radni plan Komisije za 2009. godinu, uz primjedbu da se u poglavlje Sadržaj rada za januar – mart, u dijelu Razmatranje informacije o robnoj razmjeni BiH obrađivača MVTEOBiH dodaju riječi: “ s prijedlogom mjera za smanjenje deficita“, jednoglasno je usvojen.

Ad.6. Dostavljanje prijedloga i mišljenja Komisije za izradu Orijentacionog radnog plana Predstavničkog doma za 2009.godinu na osnovu dopisa Proširenog kolegija Predstavničkog doma br.01-50-1-21-38/08, od 18.12.2009.

Prijedlog i mišljenje Komisije za izradu Orijentacionog radnog plana Predstavničkom domu jednoglasno su prihvaćeni.

Materijale iz tač. 5. i 6. dostaviti Kolegiju i sekretaru Predstavničkog doma.

Ad. 7. Tekuća pitanja:

- a) molba Sektora za međunarodne odnose i protokol za dostavljanje okvirnog pregleda međunarodnih aktivnosti Komisije u 2009.godini

Za međunarodne aktivnosti Komisije jednoglasno je predložena suma od 30.000,00 KM, što je, u odnosu na prethodnu godinu, manje za 5.000,00 KM.

b) razmatranje i zauzimanje stava Komisije o predstavkama „Vegafruit“ d.o.o. za trgovinu, preradu voća i povrća Doboj Istok; Grupacije bezalkoholnih pića VTKBiH i Udruženja proizvođača i prerađivača mesa u BiH

Podnosiocima predstavki Vegafruit“ d.o.o. za trgovinu, preradu voća i povrća Doboj Istok; i Grupacije bezalkoholnih pića VTKBiH obavijestiti da je izmjena Zakona o akcizama u BiH u nadležnosti komisija za finansije i budžet oba doma Parlamentarne skupštine BiH te da zakon nije dostavljen od ovlaštenog predlagача na razmatranje i usvajanje Parlamentarnoj skupštini BiH.

Stav Komisije o predstavljanju Udruženja proizvođača i prerađivača mesa u BiH sadržan je u zaključku Ad.3. c) ovog zapisnika.

- c) prigovor na ponovnu raspodjelu radnih prostorija Komisiji

Komisija je jednoglasno zaključila da na novi Plan funkcionalne raspodjele radnih prostorija koji je sačinila Zajednička komisija za administrativne poslove PSBiH uloži prigovor navedenoj komisiji, Kolegiju Predstavničkog doma i Kolegiju Sekretarijata s prijedlogom da Komisija nastavi koristiti prostorije u kojima sada radi.

Sjednica završena u 14,15 sati.

Sekretar Komisije
Emira Češljarić

Prvi zamjenik predsjedavajućeg Komisije
Mehmed Suljkanović